

## BESTELAKO XEDAPENAK

### HEZKUNTZA SAILA

## 5448

*AGINDUA, 2018ko urriaren 15ekoa, Hezkuntzako sailburuarena, zeinaren bidez onartzen baita Donostiako Kimika Zientzien Fakultatearen izena aldatzea.*

Autonomia Estatutuaren 16. artikulua arabera, Euskal Autonomia Erkidegoak irakas-kuntza-eskumena du, eskumenaren luze-zabalean, maila eta gradu guztietan, eta modalitate eta espezialitate orotan, eta, betiere, arau hauekin bat: Konstituzioaren lehen xedapen gehigarria; Unibertsitatei buruzko abenduaren 21eko 6/2001 Lege Organikoa –apirilaren 12ko 4/2007 Lege Organikoa aldatua–; Euskal Unibertsitate Sistemaren otsailaren 25eko 3/2004 Legea.

Unibertsitatei buruzko abenduaren 21eko 6/2001 Lege Organikoa, gerora apirilaren 12ko 4/2007 Lege Organikoaren bidez aldatua izan zenak, 8.2 artikuluan arautzen du autonomia-erki-degoei dagokiela unibertsitate publikoetako irakastegiak sortu, aldatu edo kentzea, eta erabaki hori beren kabuz har dezakete, unibertsitateetako gobernu-kontseiluaren adostasuna jasota, edo unibertsitatearen baten ekimenez, haien gobernu-kontseiluak egindako proposamenaren bidez. Kasu batean zein bestean, gizarte-kontseiluaren aurretiazko eta aldeko irizpena behar da.

Otsailaren 25eko 3/2004 Legeak, Euskal Unibertsitate Sistemarenak, 62.2.c) artikuluan arautzen du unibertsitateen gai-alorrean eskumenduna den sailaren ahalmenetako bat izango dela fakultateak, goi-mailako eskola tekniko edo politeknikoak, unibertsitate-eskolak, unibertsitate-eskola politeknikoak, ikerketako unibertsitate-institutuak edo ikasgelatik kanpoko irakaskuntza antolatzen duten beste erakunde edo ikastetxe batzuk sortu, aldatu edo ezabatzea.

Euskal Herriko Unibertsitateak proposatzen du Donostiako Kimika Zientzien Fakultatearen izena kendu eta haren ordezkari Kimika Fakultatea jartzea. Proposamenak ez dakar zentro horren izaera edo funtzioak aldatzea, izen-aldaketan oinarritutako aldaketa da-eta. Aldaketa horren helburua da, batetik, erabileragatik eta ohituragatik hedatuta dagoen izenera egokitzea, eta, bestetik, ematen den tituluarekin koherentzia handiagoa lortzea.

Otsailaren 15eko 17/2011 Dekretuak onartu zituen Euskal Herriko Unibertsitateak egun indarrean dituen estatutuak, eta araudi horren 10. artikulua arautzen du Unibertsitateak zer egitura izango dituen. Eskolak eta fakultateak dira egitura horietako batzuk. Arau horren 130. artikulua, halaber, arautzen du Gobernu Kontseiluari dagokiola fakultateak eta/edo eskolak sortu, aldatu eta ezabatzeko proposamenak egitea.

2018ko ekainaren 7ko Erabakiaren bidez, Euskal Herriko Unibertsitateko Gobernu Kontseiluak onartu zuen Donostiako Kimika Zientzien Fakultatearen izena kendu eta haren ordezkari Kimika Fakultatea jartzea.

2018ko uztailaren 25eko Erabakiaren bidez, Euskal Herriko Unibertsitateko Gizarte Kontseiluak erabaki zuen Eusko Jaurlaritzako Hezkuntza Sailari proposatzea Donostiako Kimika Zientzien Fakultatearen izena kendu eta haren ordezkari Kimika Fakultatea jartzea.

Horrenbestez, Euskal Herriko Unibertsitateko Gobernu Kontseiluak 2018ko ekainaren 7an hartu zuen erabakia eta haren Gizarte Kontseiluak 2018ko uztailaren 25ean eman zuen aldeko irizpena

ikusita, eta proposamen hori, abenduaren 21eko 6/2001 Lege Organikoaren 8.2 artikulua arautzen duen moduan, Euskal Autonomia Erkidegora igorrita, honako hau

EBAZTEN DUT:

Lehenengoa.— Onartzea Donostiako Kimika Zientzien Fakultatearen izen-aldaketa, haren ordeztu Kimika Fakultatea izena jarriko baitzaio.

Bigarrena.— Eskolak, bere jardunean, bete beharrekoak izango ditu Euskal Herriko Unibertsitateko Estatutuak, Irakaskuntza Zentroen Esparru Erregelamendua eta betetzekoak dituen gainerako arauak.

Hirugarrena.— Agindu hau Unibertsitate Politikako Biltzar Nagusiari eta Zientzia, Berrikuntza eta Unibertsitate Ministerioari jakinaraztea, azken horrek proposamena Gobernuari igor diezaion zentroaren ofizialtasuna ezartzeko, Unibertsitate, Zentro eta Tituluen Erregistroan inskriba dezan (irailaren 12ko 1509/2008 Errege Dekretuaren bidez arautua) eta Estatuko Aldizkari Ofizialean argitara eman dezan.

Vitoria-Gasteiz, 2018ko urriaren 15a.

Hezkuntzako sailburua,  
CRISTINA URIARTE TOLEDO.